

La mort a Dallas e sias consequenzas

■ **Avant 50 onns, ils 22 da november 1963 ha gi lieu l'attentat sin John F. Kennedy a Dallas. In attentat che ha schoccà las perditgas sin las vias da Dallas, ils Stadis Unids da l'America e tut il mund, perquai che las cameras han filmà la fatscha surrienta da l'emprim president da pop e suentar ils detags sanguinus da sia mort.** La naziun americana n'ha mai propri «magunà» quest attentat. Quai mussa l'obsessiun perduranta cun quest terribel eveniment, las speculaziuns sco l'istorgia fiss stada in'otra sche JFK avess survivi l'attentat e natiralmain las miriadas da teorias ch'emprovan d'expligiar l'attentat. Igl era fitg difficil d'acceptar che president Kennedy, l'um il pli pussent en il mund dal vest, pudess vegnir assassinà entaifer mo in pèr secundas d'in fanaticher sco Harvey Oswald. L'omicidi ha transformà ils Stadis Unids, ma l'omicidi ha era transformà il servetsch che ha l'obligaziun da proteger la vita dal president – il servetsch secret dals Stadis Unids da l'America.

Sch'ins vesa ozendi ils maletgs da Kennedy, sia «first lady» Jacky ed il guvernatur da Texas e sia dunna en il grond auto cabriolet, alura para quai plitost in zic naiv e nunprudent. Cler ch'il servetsch secret è vegnì confruntà cun gronda critica. Nagin dals agents avess gi l'idea da controllar ils bajetgs lung la ruta da l'auto cun il president. Il servetsch secret na veva stabili nagina collavuraziun cun la polizia a Dallas ed er avant lieu cun mo 28 persunas. In ulteriur problem era che Kennedy sa cum-


purtava betg sco ils presidents avant el. El aveva fitg gugent contacts persunals cun il pievel e sa rendeva gugent en ful-las per dar il maun a l'American ed a l'Americana.

Suentar l'attentat ha il servetsch secret immediatamain midà tschertas directivas. Natiralmain eran davent da qua las limusinas cabriolet strictamain scumandadas. L'agent Brian Leary, che ha la funcziun da pledader da medias per il servetsch secret, ha ditg en in'intervista sin CNN che sia firma saja sa sviluppada ensemen cun il svilup dal privel. Disponiva il survetsch ils 1963 anc d'in budget da 5,5 milliuns dollars era la summa creschida cuntinuantamain sin 1,6 milliardas l'onni passà.

Obama vegn conduì en ina limusina ch'è armada e cuirassada en tala maniera ch'ella vegn titulada «the Beast» – la bestia. Tgi che vul s'avischinar a president Obama sto ir tras in detectur da metal e presumablmain vegn era sia vita «radiografada» da radent avant ch'el mo po avair la speranza da vesair il president a curta distanza.

L'attentat ha pia fullà via a la tendenza d'acceptar la pussanza dals servetschs secrets da sfuignar en nossas vitas privatas per pudair proteger il mund e ses cumandants e presidents d'acts terroristics. Tgi sa sch'ils scandals da spiunascha da la NSA midan insatge vi da noss'acceptanza da la violaziun da la sfera privata per proteger il bain dal stadi e sch'ils servetschs secrets han da sa sviluppar enavos 50 onns suentar Dallas?

Andrea L. Rassel, Kreuzlingen



Avant 50 onns ha gi lieu l'attentat sin John F. Kennedy a Dallas.